



DECLARACIÓN INSTITUCIONAL PARA REXEITAR A CENSURA NO MUNDO DA CULTURA E MANIFESTAR O COMPROMISO COA LIBERDADE DE EXPRESIÓN E ARTÍSTICA

Desde a constitución das novas corporación locais, xa hai case un mes, a sociedade está asistindo ao goteo constante de episodios de censura de actos culturais por todas as cidades e vilas do país. Unha censura cultural promovida polo partido de ultradereita Vox, alí onde teñen cargos de responsabilidade coma alcaldes ou concelleiros de goberno.

Falamos de numerosos casos coma a cancelación da obra 'Muero porque no muero' de Paco Becerra nos Teatros del Canal en Madrid, a obra "Nua" de Ann Perelló en Palma, a representación de "Orlando" da compañía teatro Defondo en Valdemorillo, a representación da "Villana de Getafe" de Lope de Vega nesa vila madrileña, ou a cancelación da proxección da película "Lighthouse" en Santa Cruz de Bezana (Cantabria), entre moitos outros casos. Todos estes casos non son anecdóticos ou illados, parecen responder a unha estratexia de "guerra cultural" que a ultradereita quere levar a cabo dende as institucións públicas, estratexia que non ocultan, senón que a reafirman publicamente. O que supón un ataque directo ás liberdades que tanto custou conseguir neste país.

Todas as persoas demócratas debemos ser conscientes que esta agresión á liberdade de expresión supón un retroceso inaceptable na nosa sociedade, e temos o deber de defender todas e cada unha das conquistas democráticas que conseguimos nos últimos corenta anos de democracia. Dende as institucións debemos garantir a liberdade artística e protexer o sector cultural fronte aos que queren volver aos tempos da censura. A cultura é un dereito fundamental que, na súa creación, expresión e acceso, non debería someterse a ningún tipo de censura.

Por todo isto a Corporación municipal do Concello de Santiago de Compostela quere manifestar o seu absoluto rexeitamento e condena de todos os actos de censura que se están a producir en todo o país, reafirmamos o noso compromiso e defensa coa liberdade de expresión e artística, e mostramos o noso total apoio ao mundo cultural. Xa que sen cultura non hai democracia.

Santiago de Compostela, 26 de xullo de 2023

Miriam Louzao Fernández

Portavoz do grupo municipal de BNG

María Rozas Pérez

Portavoz do grupo municipal de CA

Gonzalo Muíños Sánchez

Portavoz do grupo municipal do PSdeG-PSOE

Borja Vereas Fraiz

Voceiro do grupo municipal do PP